

Nun höret was ich mehr da sach/
 Ich wolt zu sehn nit lassen nach/
 Zu jeder seitten warn gesteldt/
 Gelb Löwen in ein schwarzen feldt/
 Es stunden auch nebn der Schießwandt/
 Auff ider seitten ein Trabant/
 Ir kleidung waren weis vnd Roth/
 Der zu der lincken seitten hat/
 Ein Federspies/ ein Sechssischen Hut/
 Dolch vnd Degen / gemahlet gut/
 Der zu der Rechten seiten steht/
 Hielt in der Handt wol sein Bareth/
 Het auch ein Federn/ Roth vnd weis/
 Hellpart / Kappir/ mit allem fleis/

Uhrzeiger.

En vhr Seyger/auff der schißwand/
 Den ich also gemahlet fandt/
 Auff einer grünen Taffl besundt/
 Zwen güldne strich ganz Circkel rundt/
 Das felt war schwarz / thets schawen an/
 Drin theten güldne Ziffern stan/
 Es war gmacht/eins/zwey/drey vnd vier/
 Mitten darin stund/ das glaubt mir/

E iij Auch